

《雜阿含 23 經》

正觀五陰非我離慢清淨

大正 23/印順 29/佛光 23 (陰 SN18.21;SN22.71,91)

如是我聞：一時，佛住王舍城迦蘭陀竹園。

爾時，尊者羅 羅往詣佛所，頭面禮足，卻住一面，白佛言：「世尊！云何知、云何見我此識身及外境界一切相，能令無有我、我所見、我慢使繫著？」

佛告羅 羅：「善哉！善哉！能問如來：『云何知、云何見我此識身及外境界一切相，令無有我、我所見、我慢使繫著？』耶？」

羅 羅白佛言：「如是，世尊！」

佛告羅 羅：「善哉！諦聽！諦聽！善思念之！當為汝說。羅 羅！當觀若所有諸色，若過去、若未來、若現在，若內、若外，若麤、若細，若好、若醜，若遠、若近，彼一切悉皆非我、不異我、不相在，如是平等慧正觀。如是，受……想……行……識若過去、若未來、若現在，若內、若外，若麤、若細，若好、若醜，若遠、若近，彼一切非我、不異我、不相在，如是平等慧如實觀。」

如是，羅 羅！比丘如是知、如是見；如是知、如是見者，於此識身及外境界一切相，無有我、我所見、我慢使繫著。

羅 羅！比丘若如是於此識身及外境界一切相，無有我、我所見、我慢使繫著者，比丘是名斷愛欲，轉去諸結，正無間等，究竟苦邊。」

時，羅 羅聞佛所說，歡喜奉行。